

san fòlò nimòrò 1
marisi kalo 1972 san

a sòngò : dòròmè 4
b. p. 24 bamakò

Kibaru

a bè bò kalo o kalo, faso ka kibarudiso ka yamaruya kònò

an k'an kibaruw di nyògòn ma

an k'an kibaruw di nyògòn ma mun na ?

an k'an kibaruw di nyògòn ma,
walasa an ka nyògòn dòn,
walasa an hakililaw kana fò nyògòn

walasa an ka nyògòn dêmè,
walasa an ka baaraw ka nyè,
walasa an ka sôrôw ka yiriwa .

nin bée de kôsòn, faso ka kibaruso
ye lakalitasèbèn in bò, k'a tògò da
kibaru.

kibaru in bò kun ye mun ye ?

o kun ye ka malidenw jira nyògòn
na, u ka se ka nyògòn dòn, ka nyògòn
ka baaraw dòn, ka nyògòn ha-
minakow dòn, walasa mali ka nyè
taa bè sabati.
o tuma na, cikèlaw, baganmaralaw,
mônnikèlaw, jagokèlaw, mali baa-
rakèla bée, cèw ni musow, denmi-
sènw ni môgôkôrôbaw, nin lakalita-
sèbèn in ye aw ta ye. a sabatili bè
aw de bolo.

nin lakalitasèbèn kònò
aw bè kunnafoni
caman sòrò aw ka
baara kan ani jamana
sariyaw kan.



kolonèli musa tarawele ko:
**foroba wari dun ni surafèn minè
bè faso ka nyètaa nagasi**

zanwuye kalo tile 20, 1972 san,
kolonèli musa tarawele, n'o ye ma-
li kuntigi ye, a ye kuma ta sôrôda-
siw ka seli don, ka jira ko wale
damadôw bè ka kè mali kônð,
wale miñw bè faso ka nyètaa nagasi.
o walew ye foroba wari dunni ani
surafèn minè ye.

a y'a jira ko komite militèri y'a
ka yamari di ka nin wale ninw
kèlè, fo k'u ban.
o kèlè de daminèna zanwuye kalo
tile 20, 1972 san.
an bè bi miñ na, dôw miñèna fôlò.
u ka kèwalew bè ka sènsè polisiw
fè.

sumansan kibaru

nyinan sumansan konyè la, kolonèli
musa tarawele, a ka kosa fè taama
in sen fè, bamakò mara la, a ye
wele bila ka taa an balima cikèlaw
ma.
o welekan mènna cikèla nyuman
caman fè.

seni tarawele, siyela dugutigi, ye
tôni 10 feere opamu ma.
bèn jara, ka bò dugubala, o ye tôni
3 feere.
sedu kulubali, karangara dugutigi,
tôni 2.
siyema konde, ka bò jebala, tôni 1.

don o don, alifabetizasòn fònkisònèli bè sinsi mali kònò

alifabetizasòn fònkisònèli, walima mögökôrôba kalan, daminèna mali kònò, kabini 1968 san na, segu mara la, ni kalanso 17 ye. a ye eikèlaw diya, bawo a y'u caman sòn kunna-foni na, u ka baara kan. a ye barika sòrd.

an bè bi min na, kalanso 1732 de dayèlèlen bè mali dugu caman na.

kalanso 1732 tilalen bè
nin cogo la

segu	kalanso	513
kucala	kalanso	439
kulukôrô	kalanso	265
joyila	kalanso	217
kita	kalanso	197
bamakô	kalanso	91
moti	kalanso	10



mögökôrôba kalan ye nô bô dugu caman. aw bée bè golobilaji ta kala ma, bawo a fôra arajo la. tigasan waati la, kita mara la, golobilajikaw yèrè b'u ka basikili kôlôsi, k'u ka tiga girinya kalan, k'a sòngô jate minè bamanankan na.

sènèfènw san sòngò cikèlaw fè

nowanburu kalo tile fôlô, 1971 san, gôfèrènaman ye sariyaw sigi sènèfènw san sòngò kan, cikèlaw fè.

sariya n° 132 bè sumanw san sòngò kan :

nyô	kilo	dôrômè 3 ni tama 3
kaba	kilo	dôrômè 4
alikama	kilo	dôrômè 8
malo kaama jèman	kilo	dôrômè 5
malo kaama bilen	kilo	dôrômè 3 ni tama
malo kaama nyagaminen	kilo	dôrômè 4 ni taanga

sariya n° 133 bè tiga sòngò kan :

tiga wôrôlen masin na	kilo	dôrômè 9 ni tama 3
tiga wôrôlen bolo la	kilo	dôrômè 10
tiga faraman	kilo	dôrômè 6

sariya n° 134 bè kôori sòngò kan :

kôori nyuman	kilo	dôrômè 10
kôori nôgôlen	kilo	dôrômè 7

sariya n° 135 bè sikôlô ni situlu sòngò kan :


kôlô jalén	kilo	dôrômè 6
kôlô sisilen	kilo	dôrômè 7
situlu	kilo	dôrômè 14

sariya n° 136 bè bunbun sòngò kan :


bunbun	kilo	dôrômè 5
--------	------	----------

saribilenni bè forobaara caman kè


bi eikèlaw lafiyara. forobaaraw nôgôyara. mun fè ? saribilenni fè. saribilenni bè se ka forobaaraw caman kè.




a bè se ka dugukolo jalan shiyèn, walasa sankunnaji bè se ka jigin dugu la, k'a sumaya.



a bè se ka bulukuli kè.



a bè se ka kôrôshiyènni ni kôrôcili kè.



a bè se ka judonni kè.

nka, a tè se ka nin baara si kè, fo i ka foro gungurunw bèè kè, ka danni kè sira fè.

tigasènèna, kôorisènèna, nyôsènèna, cikèla bèè, aw hamnakow nôgôyara sa.

saribilenni sòngò ye 6 000 ye.

kunatòw ka seli bamakò

kari don, feburuye kalo tile 13, 1972 san, kunatòw ka seli 19n kèra mali duguba bée la.

bamakòkaw y'u ta kè k'a diya. seli in kèra kunatòw ka dökötörösoba de la.

kolonèli musa tarawele, n'o ye komite militèri peresidan ani mali kuntigi ye, o yèrè n'a muso tun bë yen.


bènincinin fofana, n'o ye minisitiri ye, min b'an ka dökötörösow kun na, o ye kuma ta.

a y'a jira ko nyinan seli kama, wari min nina kènèbagatòw fè, o y'a to se kèra ka finiw ni dumuniw ni minèn caman san kunatòw ye.

bènincinin fofana ka kuma laban na, a y'a jira ko bi kònì, kuna ye bana ye, min bë se ka furakè a nyè ma.

o de kama, an b'a nyini aw fè, ni kunatò bë minw ka so, u k'u jija ka dökötöròw bò a kala ma.

janto yèrè la kòròko ka nyi



nisondiyafuraninw

nisondiyafuranin suguya ka ea : dòw ye furakisè ye, dòw jilaman don, dòw yèrè ye siramonyòn ye. u bë baara sègèn tunun i fari la, a daminè na, nka a mèn o mèn, u b'i halaki, k'i kè dònbagalafili ye. a y'aw kòlòsi nisondiyafuraninw na. u bë mògò halaki.

kanjabana

sisan ye kônyò waatiw ye. sani tulon ka bò, a ye npogotigiw bila ka fèrew sòn : o bë gòngòn bali ka wuli.

mògò caman nyè na, ka ji furufuru so kérèfèlaw la, o ye tubabuya de ye. tubabuya tè. a bë mògò tanga kanjabana kisè de ma.

k'a ta marisi kalo la, fo ka se mè kalo ma, finyè bë ci kojugu. funteni bë kè, gòngòn bë wuli. kòmi kanjabana kisè bë sòrò gòngòn de kònò, gòngòn mana wuli, an nyontò b'o kisè sama ka don an nun fè.

o de kama, dugubaw kònò, mògòw bë soli ka ji furufuru u ka so kérèfèlaw la. jitamobiliw fana bë nbèdaw sòn.

sògòma o sògòma, mògò dòw fana bë fura tuluman mu u nun kònò ka kanjabana kisè bali ka don.

ni fura tuluman tè sòrò yòrò min na, situlu bë se k'a nyè.

kibaru misènninw

bafulabe: waraba 3 fagara

banja keyita ye tigasènè sèriwisi kuntigi ye bafulabe. zanwuye kalo kònò, a segintò don dò la, ka bò a ka taama dò sen fè, a barila waraba naani na, mahina donda la. u tun bë ka ntura kelen dun. banja kèlen k'u ye, a y'a ka tubabumarifa ta, k'u suma, ka sòrò k'u bon. a ye waraba 3 faga o yòrò bée. naaninan bolila.

nin kèlen kò, banja taara a nyèfò kube la. banja ye eèya kè. a ye misi wèrè kelen kisi.

abdulayi tarawele

bamakò: dòròmè 1.000 sonyèna

feburuye kalo tile 9 su, muso dò ye takisi ta korofina sira la ka taa dari-salamu. a selen, a ye baà kelen biye di takisi sofèrè ma, k'i jò ka wari misèn kònò. salifu jalo, n'o ye takisi sofèrè tònyògònkè ye, o y'i yèrè kè wari falenbaga ye. u kumanen nyoggòn fè sinèfòkan na, yakuba danbele n'o ye sofèrè ye, o ye mobili wuli. u bolila ka taa, kà muso jòlen to yen. o tun tè dò wèrè dòn mobili nimòrò la, jateden fila dòròn kò. o de kèra sababu ye ka nson fila ninw minè. n'aw kèra takisi tabaga ye bamakò su fè, a y'aw jan to a nimòrò la.

libirili jalo

kuma bë aw de bolo

n'a fòra ko lakanitasèbèn in ye aw ta ye, o kòrò filè nin ye : kibaruw min mana kè i fè, n'i b'a fè mògò ka ladònniya o la, o bë se ka sèbèn lakanitasèbèn in na.

n'i sago bë ka kunnafoni sòrò ko min na, o kunnafoni bë se ka di i ma lakanitasèbèn in fè.

i hakilila mana kè min ye, n'i y'o lase an ma, o fana bë se ka sèbèn lakanitasèbèn in na.


o bée bë bèn cogo min na, o ye i ka lètèrè ci an ma. o tuma, i ka kan ka min sèbèn o lètèrè foroko kan, o filè nin ye :

kibaru
b. p. 24
bamakò

bamakò fuwari 53n dayèlèla, marisi kalo tile 4, 1972 san

marisi kalo tile 4 don, kolonèli musa tarawele n'a muso ye bamakò fuwari biduuru ni sabanan dayèlè. nyinan, bamakò fuwari fèn' jirata cayara kojugu, fo fuwari kènè kèra fila ye. kènè fòlò kèra sèriwisidaw ni izinitigiw ta ye. filanan kèra cikèlaw ta ye.

peresidan musa tarawele n'a nôfèmôgôw ye fuwari lajèli daminè. u fòlòla izinitigiw ka kènè na. yen, sèriwisida bée, ani izini bée, mali taw ni kènyèrèye taw de y'u bolofènw n'u ka baarakèminènw jing. k'a ta sèriwisiw la, minw bë cikèlaw kun na, fo ka n'a bila mobilifeerelaw la, ka tèmèn nôndilà izini ni sigaratidila izini, ni bagidila izini ani somiyèsi fè, peresidan musa n'a nôfèmôgôw ye nin bée ka baarakènòw lajè. o kôfè, a n'a ka jama taara cikèlaw ka fuwari kènè fana lajè. a nisondiyalenba de bòra fuwari in na. sèriwisidaw ni iziniw ani cikèlaw bée y'a jira nin fuwari in na, k'u



jò yòròba de bë mali ka nyètaa la. sèriwisi minw nyèsinnen bë cikèlaw ka baara ma, olu y'a jira ko cikè cogo ka kan ka yèlèma, n'an b'a fè ka sòrò kè :
foro gungurunw ka kan ka bò, ci ka kan ka kè ni saribilennin ye, danni ka kan ka k'a tuma na, sumansiw ka kan ka mara ani ka furakè konyuman,

nôgô ka kan ka don foro la. izini minw bë sènèfènw bayèlèmà, olu fana y'a jira k'u tè se ka nyè cikèlaw kò. i mana mèn k'olu nyôgôñ nôndilala tè, u nyôgôñ sigaratidilala tè, u nyôgôñ bagidilala tè, u nyôgôñ tuludilala tè, nônd ni tiga ni sira ani kòori de sòròla. u y'a nyini fana malidenw fè, u ka mali ka fèn dilalenw san.

mali ntolacilaw ye dawula sòrò 1972 kupudafiriki la

san fila o san fila, afiriki jamanaw bë jè ka nyôgôndan dò kè ntolaci la. o nyôgôndan sen fè, kupu bë da. o kupu in de bë wele kupudafiriki. kupudafiriki ntolaci in daminèna 1957 san na, misira ja-

mana fè, o ni nyinan cè ye san 15 ye. kupudafiriki da ko seginnan ye 1972 ta ye. mali bòko fòlò de ye nin ye ntolaci in kènè kan. mali ntolacila 22 de

taara feburuye kalo tile 20, 1972 kupudafiriki la yawunde, n'o ye kamerun faama dugu ye. yawunde ntolaci in gèlèyara, fo k'a fò a gèlèyara.

1972 kupudafiriki in ntolaci laban kèra mali ni kongo de cè, marisi kalo tile 5, yawunde. o don ntola tanna, fo k'a fò a tanna. mali fòlò ye bi 1 don. mitan filanan na, kongo y'o bò, ka sòrò ka bi 2 don. mali y'a ta dafa bi 2 la. ntola bilala, kongo sera mali la, 3 ni 2. 1972 kupudafiriki dira a ma.

nka, mali ma malo, bawo farafinna bée, o kèra filanan ye. a ye kupu filanan sòrò, min b'a jira k'an ka ntolaci nyèkun ka nyi. o kôfè, fantamadi keyita de kèra farafinna bidonna gana ye. an ka kan k'an ka ntolacilaw fo, foli min, ni cè farinw ka kann'a ye.

